



人艱苦

拜一的下晝頓才食煞，阿華就落佢吐，過差不多十桶分，規個人頭垂尾頰對便所踹出來。伊面色死白頓落去膨椅頂手擱心肝窟仔下講：「這搭砧砧槽槽應該是胃。」我隨應講下晡成大猶有咧門診，毋通閣延矣。好禮仔共阿華牽上車，替伊共安全帶縛好勢，才起行。

點半到掛號的地場，規間人考考圍甲欲烏去，倚甲絞活欲痠死才掛著 39 號的門診。這聲苦矣，若無蹠到 4~5 點決定袂煞，姑不將就揣椅仔罔坐罔等。共手機仔擷出來耍『sudoku』，才起鼓爾，阿華面色青恂恂，叫我扶伊去便所，就伸手慢過肩胛頭，半牽半拖都袂到洗手槽仔遐，人就拑倚去噁噁叫。滯滯的臭酸飯佢菜葉仔隨共排水空窰牢著，呷無歇的喙瀾波佢額頭的清汗直透津落去槽仔底。我驚講予病院的 oo-bá-sáng 歹摒盪，繼手怙撈的，共擲落去槽仔邊的糞掃桶，才閣扶伊轉來揣椅仔歇睏。

阿華這站仔人真正有歲矣，身軀的機器一冬一冬各樣去，不時就遮哀遐疼，出入醫生館袂輸咧行灶跤全款。這猶小局，拄搪人無爽快閣看著袂過目的代誌就誠歹聲嗽隨欲佢人起呷面。上接載袂牢的是一支喙敢若機關銃按呢，遮罨遐體，比用針咧戳人閣較害。

人講跋筊會當檢驗一个人真正的性癖，破病嘛是全款。佇食穿冗剩、快活過日的流擺，顧耍、顧暢都袂赴矣，盍有閒工通受氣咧？毋過人是食五穀的，無法度保領逐工攏掛無事牌，加減嘛有辛苦病疼的時陣，就龜跤總趑趑出來，袂輸換一个人款按呢，仙都想袂曉豈會變甲才歹死咧？

這佢個人修養的深淺、受教育的懸低敢有牽連咧？我想是無，反顛倒是祖傳牢入骨的種，講較白的就是爸母生成所致的，親像落塗時八字命按呢仙剝都袂用。比一个例來講，阮老母無讀過冊嘛毋捌字，反顛倒講話輕聲細說，袂共人供體、盥洗，閣較免講是拍人、罨人。袂吞忍的人就準伊讀較濟冊，受較懸的教育，火炆性嘛是即時夯起來，攏袂掩崁得。

作者：藍春瑞

☆詞彙學習☆

- | | |
|----------------------------|-----------------------------|
| 【踹】phîn：走路不穩 | 【各樣】koh-iūnn：異常 |
| 【砧砧】tiam-tiam：刺痛的感覺 | 【過目】kuè-bák：順眼；中意 |
| 【考考】khó-khó：人多而密 | 【起呷面】khí-phui-bīn：翻臉 |
| 【蹠】thōng：拖延 | 【遮罨遐體】tsia-lé-hia-thé：辱罵兼嘲諷 |
| 【決定】kuat-tīng：絕對 | 【冗剩】liōng-siōng：充裕；有餘裕 |
| 【sudoku】數獨；一種填 1~9 數字的遊戲 | 【保領】pó-niá：保證 |
| 【起鼓】khí-kóo：開始 | 【龜跤】ku-kha：破綻；（露出）馬腳 |
| 【青恂恂】tshenn-sún-sún：臉色發青 | 【用】lut：脫落 |
| 【oo-bá-sáng】：對中年婦女的敬稱；源自日語 | 【火炆性】hué-hu-sìng：容易動怒的個性 |
| 【滯滯】siūnn-siūnn：黏液濃稠的樣態 | 【掩崁】am-khàm：遮掩；隱瞞 |